



JUDICIAL SYSTEM MONITORING PROGRAMME PROGRAMA DE MONITORIZAÇÃO DO SISTEMA JUDICIAL

Komunikado Imprensa

Período : Setembro 2009

Assesor Militar ba Prezidente fo Depoimentu iha Julgamentu Kontinuasaun ba Kazu 11 de Fevereiro 2008

Kazu atentadu 11 Fevereiro ne'ebe maka hakanek Presidente da Republik Ramos Horta no hamate mos matebian Major Alfredo no Leopoldino Exposto to'o agora nia prosesu julgamentu sei kontinua nafatin iha tribunal Distrital de Dili.

Iha Tersa feira (15/9) loro kraik tribunal refere kontinua rona depoimentus husi testamuña ne'ebe hetan ona notifikasaun husi tribunal. Tuir observasaun JSMP, testamuña sira ne'ebe maka marka prezensa iha tribunal hamutuk iha nain 7 maibe tribunal la konsegue rona sira nia depoimentus hotu tanba tempu la suficiente. Iha julgamentu ne'e tribunal rona deit testamuña nain rua (2) ho inisial JM no AM.

Testamuña JM ne'ebe maka fo nia depoimentus konaba akontesementu 11 Fevereiro 2008 iha rezidencia Prezidente hateten katak nia rona akontesementu ne'e liu husi Alferis David ne'ebe maka informa ba testamunha katak iha asaltu husi grupu deskuñesidu iha rezidencia PR. Rona tiha informasaun ida ne'e testamuña direktamente husi Quartel F-FDTL Tasi Tolu ba kedas iha fatin akontesementu. To'o iha fatin akontesementu, testamuña haré duni mate isin matebian Alfredo no Leopoldino maibe nia la hare kilat iha mate isin tanba kilat sira ne'e hasai tiha hotu ona husi forsas sira ne'ebe maka iha fatin ne'eba. Nune'e mos bainhira testamuña to'o iha fatin akontesementu polisia GNR no militar Nova Zelandia iha tiha ona ne'eba antes. Hatan konaba haré Prezidente da Republika iha fatin ne'eba ka lae, testamuña hatan nia la haré presidente iha fatin akontesementu. Nia haré deit maka kareta Ambulansia ida hasoru nia iha Hotel Victoria, Metiaut diresaun mai Dili bainhira testamuña foin atu ba fatin akontesementu.

Testamuña JM ne'e hato'o nia depoimentus kuaze iha oras tolu nia laran hodi kumpri no responde ba perguntas ne'ebe mai husi Ministeriu Publiku no Defensor no Advogado husi arguido sira. JSMP nota katak testamuña ne'e hatan ho kuidadu tebes ba perguntas sira tanba iha perguntas ne'ebe maka tuir testamuña ne'e difisil atu esplika.

Aleinde testamuña JM, tribunal mos rona testamuña AM nia depoimentus. Testamuña AM ida ne'e iha nia depoimentus bainhira hatan perguntas husi Ministeru Publiku no defensor/advogados sira konaba nia kuñesementu ne'ebe nia iha bainhira nia hala'o nia kna'ar nu'udar fasilitador (MUNJ) entre Governu no grupu Major Alfredo Reinado, tanba ne'e testamuña hateten katak nia haluhan buat barak ona inklui fatin inkontru balun, data de inkontru no kareta saida mak sira uza..

Testamuña AM ne'e mos hateten katak, nia la hatene konteudo husi inkontru entre PR no Major Alfredo dala hira ne'ebe maka nia akompanha tanba nia la tama ba iha fatin diálogo. Testamuña ne'e salienta liu tan katak, nia nu'udar membru husi Movimento Unidade Nasional ba Justica (MUNJ) só fasilita hodi realiza diálogo entre PR no Grupo Major Alfredo iha tempu ne'eba. Funsauun MUNJ maka hanesan fasilitator ho funsauun limitadu atu prepara, propoin data tentativa no fatin atu realiza diálogo. Perguntas konaba sé loos maka funda/hari'i MUNJ no sé-sé maka nia fundador no to'o agora sei eziste ka lae, Testamuña ne'e hatan la hatene.

Hafoin rona tiha depoimentus husi testamunha AM, tribunal mos husu dokumentus karta kredensial koletiva no singular ne'ebe maka Presidente da Republika fornese ba testamuña (MUNJ) iha tempu ne'e ba nu'udar *guia de marca* hodi halo movimentu iha rai laran bainhira durante estadu deklarada estadu de sítio ou estadu de emergencia nia laran. Dokumentus sira ne'e tribunal husu atu junta iha aktus nia laran.

Atu hetan informasaun kle'an favor kontaktu:

Luis de Oliveira Sampaio

Direitor Ezekutivu JSMP

Diresaun e – mail: luis@jsmp.minihub.org

Landline: 3323883